

浙江圖書館叢書 第一集

新刊國朝詩林卷一百一十五

浙江圖書館叢書第一集

新五代史四夷

附錄地理攷證

中華民國四年浙
江圖書館校刊

新五代史四夷附錄地理攷證

仁和丁謙益甫氏學

契丹自後魏以來名見中國或曰與庫莫奚同類異種其居曰
梟羅箇沒里沒里者河也是爲潢水之南黃龍之北得鮮卑之
故地故又以爲鮮卑遺種唐時其地北接室韋東鄰高麗西界
奚國而南至營州部族之大者曰大賀氏後分八部部之長號
大人常推一大人以統八部劉仁恭據幽州數出兵攻之燒其
野草契丹馬多死時大人曰遙輦衆以爲不任事推阿保機代
之阿保機多智勇善騎射值劉守光殘暴幽涿之人多亡入契
丹阿保機置城以居之漢人教之曰中國王無代立者由是阿
保機威制諸部而不肯代立九年諸部貢謂之始不得已傳其

旗鼓乃謂諸部曰吾所得漢人多矣欲自爲一部以治漢城可乎衆許之漢城在炭山東南灤河上有鹽鐵之利地可種五穀漢人安之阿保機知衆可用用其妻述律策召諸大人會鹽池而盡殺之遂不復代梁將篡唐晉王李克用與保機約爲兄弟期其擊梁旣而背約稱臣於梁以求冊封圍晉將周德威於幽州莊宗遣李嗣源等救之乃解去阿保機自僭稱天皇王以所居地名爲姓曰世里譯者謂之耶律以所居爲上京起樓其間號西樓於其東千里起東樓北三百里起北樓南木葉山起南樓往來射獵其間莊宗討張文禮圍鎮州定州王處直懼及己遣子說契丹使入塞阿保機遂空國入寇攻幽州不克陷涿州又攻中山渡沙河莊宗自將擊敗之阿保機退去自此頗有窺

中國之志。患女真渤海在其後。欲擊渤海。先通好於唐。乃攻渤海。取扶餘城。以爲東丹國。封其長子突欲爲東丹王。已而阿保機死。國人立其次子德光。突欲不得立。遂自扶餘泛海奔於唐。定州王都反。唐遣王晏球討之。德光遣將救之。晏球敗之於曲陽。又敗之於唐河。距幽州北七百里。有榆關。關東臨海。北有兔耳覆舟等山。皆斗絕。並海東北有路。狹僅通車。其旁地可耕植。唐時置戍以扼契丹。自唐末。幽薊割據。戍兵廢散。契丹因得出陷平營。而幽薊歲苦寇鈔。自涿至幽。人跡斷絕。轉餉常以兵護。莊宗末。趙德鈞鎮幽州。於鹽溝置良鄉縣。又於幽州東五十里築城。皆戍以兵。又於其東置三河縣。由是幽薊之人始得耕牧。輸餉可通。德光乃西徙居擦剌泊。出寇雲朔之間。明宗患之。以

石敬瑭鎮河東總四鎮兵禦之敬瑭反求救德光德光赴之破
張敬達兵敬達退保晉安寨德光圍之唐遣趙德鈞往救而德
鈞父子按兵不赴德光乃立敬瑭爲帝敬瑭入洛乃北還契丹
當莊宗時攻陷營平二州及已立晉又得雁門以北合十六州
乃以幽州爲燕京改元會同更國號曰遼置百官參用中國人
初敬瑭奉契丹甚謹及出帝卽位德光怒其不先告而又不稱
臣而稱孫數遣使責問而大臣景延廣語不遜德光益怒會楊
光遠反青州招之開運元年春遂大舉入寇西出雁門攻并州
爲劉知遠所敗東陷博州以應光遠德光自攻下貝州屯元城
兵及黎陽與晉相距於河月餘戰於賊城殺傷相半德光引兵
還二年九月復傾國入寇圍鎮州下鼓城等九縣南掠邢洛磁

至於安陽河。帝遣軍拒之。乃引去。契丹已北聞。帝下詔親征。復引而南。戰於陽城衛村。晉軍奮擊大敗之。三年七月。寇鎮州。杜重威屯中渡。與德光夾水而軍。德光分兵並西山出。晉軍後破欒城。重威被圍糧絕。遂舉軍降。四年正月。德光入京師。封出帝爲負義侯。遷於黃龍府。漢高祖起太原。所在州鎮多殺契丹守將。歸漢。德光大懼。又時已熱。乃以蕭翰爲宣武軍節度使。守汴。乃北歸。行至欒城。得疾。卒於殺胡林。契丹破腹實以鹽。載之而去。晉人謂之帝羆。永康王元欲立。元欲東丹王突欲子也。突欲奔於唐。元欲留不從。號永康王。德光滅晉。元欲從至京師。德光死。欒城元欲在鎮州。稱德光遺制。卽皇帝位。使人報其祖母述律。述律怒。率兵迎元欲。將廢之。相拒於石橋。述律兵多亡。歸元

欲遂幽述律於祖州阿保機墓所兀欲更名阮號天授帝漢乾
祐五年兀欲攻邢州陷內邱以死傷多引退後復謀入寇諸部
皆不欲兀欲強之遂殺兀欲德光子述律立遂不復南周世宗
顯德六年北征瓦橋淤口關瀛莫二州皆降乃置雄州於瓦橋
關霸州於益津關而還述律聞之曰此本漢地今以還漢又何
惜耶述律後爲扈人所殺

嗚呼自古夷狄服叛雖不繫中國之盛衰而中國之制夷狄則
必因其強弱予讀周日歷見世宗取瀛莫定三關兵不血刃而
史官譏其以王者之師馳千里而襲人輕萬乘之重於荏葦之
閒以僥倖一勝夫兵法決機因勢有不可失之時世宗南平淮
甸北伐契丹乘其勝威擊其昏殆世徒見周師之出何速而不

知述律有可取之機也。是時述律以爲周之所取皆漢故地，不足顧也。然則十四州之故地，皆可指麾而取矣。不幸世宗遇疾，功志不就。然瀛莫三關遂得復爲中國之人，而十四州之俗至今陷於夷狄，彼其爲志豈不可惜，而其功不亦壯哉！夫兵之變化屈伸，豈區區守常談者所可識也？初蕭翰北歸，有邵陽縣令胡嶠爲翰掌書記，隨入契丹。而翰妻爭妬，告翰謀反。翰見殺。嶠居虜中七年，亡還中國，略能道其所見。云自幽州西北入居庸關，明日又西北入石門關，關路險狹。又三日至可汗州，又三日至新武州，西北五十里有雞鳴山，明日入永定關，此唐故關也。又四日至歸化州，又三日登天嶺，嶺東西連亘，有路北下，又行三四日至黑榆林。時七月，寒如深冬。明日入斜谷，谷長五十里。

崖谷高峻寒尤甚出谷得平地稍溫又二日渡湟水明日渡黑
水又二日至湯城淀地氣最溫又二日至儀坤州渡麴香河又
二日至赤崖翰與兀欲相及遂及述律戰於沙河述律兵敗被
囚又三日至上京所謂西樓也按遼地理志明載西樓在祖
州此謂上京卽西樓殊誤自

上京東去四十里至眞珠寨明日東行地勢漸高西望平地松
林鬱然數十里遂入平州又東行至裏潭遂入大山十餘日而
出至一大林時兀欲卓帳於此會葬德光自此西南行日六七
十里凡七日至大山南兩高山相去一里有屋室碑石曰陵所
也嶠所目見囚述律葬德光事與中國所記差異已而翰得罪
被鎖嶠與部曲東之福州卽翰所治也東行過十三山又東行
數日過衛州嶠至福州契丹多憐嶠教其逃歸因得其諸國種

類遠近云距契丹國東至海有鐵甸又東女真善射人無定居
又東南渤海又東遼國皆與契丹略同又南奚又南至於榆關
矣西南儒州故漢地西則突厥回紇西北至嫺厥律其人長大
水出大魚契丹仰食人最勇鄰國不敢侵又西轄戛又北單于
突厥又北黑車子又北牛蹄突厥人身牛足地尤寒水曰葫蘆
河東北至轆劫子尤善射契丹等國皆畏之其國三面皆室韋
一室韋二黃頭室韋三獸室韋地多銅鐵金銀人工巧善制器
織毛錦又北狗國人身狗首語爲犬噪蓋契丹嘗遣人齎糧北
行窮其所見如此嶠歸錄以爲陷虜記云

契丹之名始見魏書北齊書隋書新唐書因之攷遼史契丹
之先曰奇首可汗生八子後分八部大賀氏前清官書稱爲

達瑚爾曾載入滿洲姓氏錄。今俄屬貝加爾湖以東尙有此族。人居住當與東三省達瑚爾人同種。唐開元時大賀氏旣微。遙輦氏部中自立可汗。卽傳所云常舉一人以統八部者也。太祖先世爲迭刺部。不在八部之列。至是始代遙輦氏爲可汗。惟遼史又言太祖有帝王之度。三一代遙輦氏尊九帳於御帳上。知太祖卽位待遙輦族厚。傳謂召諸大人會鹽池。盡殺之。恐中土傳聞不足爲據。此宋無名氏著遼志中語。歐公誤採之也。至契丹舊地。據遼史部族志云。始祖奇首可汗居潢河西。土河北。及元魏末。莫弗賀于畏高麗蠕蠕侵逼。始去奇首故壤。居白狼水東北。未幾爲齊文宣所破。部落離散。至隋初內附。許還居白狼水。後部衆漸盛。乃北徙。依吐紇臣水而居。攷土河漢以

來稱徒河。今日圖爾根河爲大淩河之北源。奇首所居當在
今柰曼敖漢二旗境。但本傳言潢水南。遼志則云潢河西。雖
似兩岐。實則潢水西來。經其部北。卽折而東南流。故可言南。
亦可言西。且合兩說。核之其故部所在。益瞭然可指。白狼水
卽大淩河。當時徙居河東北者。欲倚中國以自保。吐紇臣水
卽土河。本名蓋。又由大淩河境稍徙而北矣。本傳所謂梟羅
箇沒里。據遼地志。武安州有梟羅水。箇沒里水。梟羅與箇係
兩水名。按梟羅者饒樂之轉音。卽今老哈河。箇者土之轉音。
卽今圖爾根河。武安州當在老哈河東。故轄境東抵土河西。
抵饒樂。契丹自隋以後。依吐紇臣水而居。故在此二河間。非
奇首時故壤也。奇首故壤尚在東北。潢水胡嶠記作湟水。今稱錫喇木。

倫河在熱河北界黃龍一名和龍乃慕容燕都城今朝陽縣境室韋諸部皆在黑龍江境故北與相接唐初高麗據有遼東全地故東與相鄰奚部在老哈河西故西與相界唐營州治柳城在朝陽縣南近小凌河處遼太祖所築漢城卽臨潢府遼地志言天贊初南攻燕薊以所俘人戶散居潢水北縣臨潢水故名卽今阿魯科爾沁旗南波羅城也攷見下炭山遼地理志不載以漢城在其東南揆之當指慶州西之黑山因山黑如炭故俗以炭山稱之西樓在臨潢西南三十里祖州地南樓據遼地志言永州本南樓地東潢河南土河有木葉山上建始祖奇首可汗廟又有高淀山柳林淀亦曰馬淀按此條必有舛訛殆誤以東樓之地爲南樓也東潢河南土

河正奇首所居土河北潢河西之對文以奇首故居故建廟
於此遼志謂東樓在龍化州卽今柰曼旗牧境實潢土二河
中間地遼太祖紀天復二年九月城龍化州於潢河南可證
自本條採東都事略無稽俗說謂昔有神人浮土河而東又
有神女泛潢河而下至木葉山二水合流處相遇配偶生八
子後遂分八部云云著述家始確指老哈河爲土河謂木葉
山卽在台流地不知土河潢河源流各異並不相通且建始
祖廟不於始祖居地乃信傳聞移之老哈河潢河合處謬矣
又況蒙古游牧記明載木葉山高淀山柳林淀馬淀等均在
克什克騰旗境內距老哈河潢河合處甚遠知當日所置永
州及南樓實在其地無疑至傳云北三百里起北樓地在何